

## MUNDARTECKE BUCHS

# Werdenberger Talsegen

hoo ho ho hoi  
hoo ho ho hoi  
hoo ho ho hoi

DU wo dr Winn gmacht hesch  
schigg dr richtig Luft zur richtiga Zit  
dr chlii Winn, dr mittler Winn  
dr Pföa, wens nötig isch  
dass d Truuba riifen ada Häng un dr Türgga n im Tal  
bewaarnis vor Uuwetter, Hagel un Schtürm

hoo hoi hoo hoi

DU wo s Wasser gmacht hesch  
dr Reega, s Riiwasser, p Bäch  
p Malschüelerquella, wonis trenggt un erquickt  
DU wo dr Morgatou machscht, dr Obedtou  
schiggnis s Wasser im richtiga Maass  
bewaarnis vor Überschwemmig un Fluet

hoo hoi hoo hoi

DU wo p Berg gmacht hesch, p Felsa, d Schtäi  
dr Margelchopf, d trei Schwöschtera, dr Hurscht  
wonis beschützen Tag un Nacht, wonis Schatta gen  
un an Horizont – Usbligg un Witbligg  
loss p Berg, wia sin, loss d Schtäi, wo sin  
bewaarnis vor Schtäischlag un Felsschurz

hoo hoi hoo hoi

DU wos Fүүr gmacht hesch  
p Flamma, p Fungga, g Gluat  
womr bruuchen, womr fürchten  
DU wo dr Blizz gmacht hesch vilicht im Zorn  
verschoan uf da n Alpa d Hirta un s Vee  
bewaarnis vor Fүүrbrunscht un Blizzschlag

hoo ho ho hoi  
hoo ho ho hoi  
hoo ho ho hoi

\*

In Anlehnung an den Betruf der Älpler hat die **Buchser** Lyrikerin **Elsbeth Maag-Lippuner**, geboren 1944, für das Erzähl-Kunst-Festival 2011 den «Werdenberger Talsegen» verfasst. Die Mundartecke wird von der Historisch-Heimatkundlichen Vereinigung der Region Werdenberg betreut.